

Служба

на преставление преподобныя матере нашея Евфросинии,

игумении и княжны Полотския

Месяца мая, день 23

НА ВЕЛИЦЕЙ ВЕЧЕРНИ

На Господи, воззвах: стихиры, глас 6:

Ангелом честную и вселюбезную чистоту возлюбивши,/ преподобная мати Евфросиние,/ Христу от юности своя себе уневестила еси./ Емуже ныне со Ангелы предстоящи,/ моли о чтущих благочестно память твою.

Ангельскому житию подражаючи,/ постом и молитвами Христу, яко безплотна, послужила еси./ Ныне со ангельскими чинми водворяющися/ в чертозе Безсмертнаго Жениха твоего,/ моли, Егоже возлюбила еси,/ о чтущих радостно всечестную память твою.

Ангелоподобное житие восприемши,/ славу временную, и богатство,/ и дом отчий, и обручника земнаго оставила еси/ и сих ради воздаяние вечное на Небеси восприяла еси,/ идеже со Ангелы радующися,/ моли о чтущих любовию память твою.

Ины стихиры, глас тойже.

Подобен: Тридневен:

Из корене благородна/ благородством и многими добротами плод процвела еси,/ возрастши лоза по всей земли Русской/ и в Полотсте граде,/ осеняющи и вином веселия напояючи, Евфросиние,/ присно молящих ти ся.

Яко виноград Русския земли,/ Полотску граду насадив Бог прежде,/ тебе ныне же принесе и преложив в землю обетованную,/ преподобная Евфросиние, монахов удобрение.

Умертвивши тело, душею ожила еси,/ из земли отеческия, Полотска града, воздвигшися,/ в Сион прииде,/ и все свое богатство раздала еси тамо,/ и приемлещи Небесная.

Давида и Романа в мученицех/ и в преподобных блаженнаго Феодосия, Евфросиние, венчанных видевши,/ себе, яко жертву, давши Богови,/ от князей русских Полотския земли/ потщалася еси братии единомыслити,

блаженная,/ и княгининского лика начаток самообещан приносится Богу,/ да с теми восприяти обещанная благая,/ егоже ради трудившись.

Слава, глас тойже: Монашескаго чина удобрение/ и черноризиц похвалу радостно воспоим днесь,/ Царя Христа Бога нашего восхваляюще:/ Сей бо, яко Освятитель святых и похвала преподобных,/ прослави нетлением мощи преподобныя Евфросинии,/ имже благовернии людие благоговейно предстояще/ и с любовию лобызающе я,/ исцеления в болезнях приемлют/ и в скорбех утешение/ и радостно со умилением глаголют:/ радуйся, Евфросиние, невесто Христова всечестная.

И ныне, Богородичен: Кто Тебе не ублажит, Пресвятая Дево? Кто ли не воспоет Твоего Пречистаго Рождества?/ Безлетно бо от Отца возсиявый Сын Единородный,/ Тойже от Тебе, Чистая, пройде,/ неизреченно воплощся;/ естеством Бог Сый/ и естеством быв Человек нас ради;/ не во двою лицу разделяемый,/ но во двою естеству/ неслитно познаваемый./ Того моли, Чистая, Всеблаженная,/ помиловатися душам нашим.

Вход. Прокимен дне. И чтения.

Премудрости Соломоновы чтение (глава 3):

Праведных души в руке Божией,/ и не прикоснется их мука./ Непщевани быша во очесех безумных умрети,/ и вменися озлобление исход их,/ и еже от нас шествие сокрушение;/ они же суть в мире./ Ибо пред лицом человеческим аще и муку примут,/ упование их безсмертия исполнено./ И в мале наказани бывше, великими благодетельствовани будут,/ яко Бог искуси я и обрете их достойны Себе./ Яко злато в горниле, искуси их/ и, яко всеплодие жертвенное, прият я./ И во время посещения их возсияют/ и, яко искры по стеблю, потекут:/ судят языком и обладают людьми,/ и воцарится Господь в них во веки./ Надеющиеся Нань разумеют истину/ и вернии в любви пребудут Ему,/ яко благодать и милость в преподобных Его/ и посещение во избранных Его.

Премудрости Соломоновы чтение (главы 5 и 6):

Праведницы во веки живут,/ и в Господе мзда их, и попечение их у Вышняго./ Сего ради примут Царствие благолепия/ и венец доброты от руки Господни,/ зане десницею покрывает я и мышцею защитит их./ Приимет всеоружие рвение Свое/ и вооружит тварь в месть врагом./ Облечется в броня правды/ и возложит шлем суд нелицемерен./ Приимет щит непобедимый преподобие,/ поострит же напрасный гнев во оружие,/ споборет же с ним мир на безумныя./ Пойдут праволучныя стрелы молниины/ и, яко от благокругла лука облаков, на намерение полетят./ И, от каменометныя ярости исполнь, падут грады,/ вознегодует на них вода морская,/ реки же потопят я нагло./ Сопротив станет им дух силы/ и, яко вихор, развеет их,/ и опустошит всю

землю беззаконие,/ и злодейство превратит престолы сильных./ Слышите убо, царие, и разумеите,/ навькните, судии концев земли,/ внушите держащий множества/ и гордящийся о народах язык,/ яко дана есть от Господа держава вам/ и сила от Вышняго.

Премудрости Соломоновы чтение (глава 4):

Праведник, аще постигнет скончаться, в покои будет./ Старость бо честна не многолетна,/ ниже в числе лет исчисляется./ Седина же есть мудрость человеком/ и возраст старости – житие нескверное./ Благоугоден Богу быв, возлюблен бысть/ и живой посреде грешник, преставлен бысть./ Восхищен бысть, да не злоба изменит разума его,/ или лесь прельстит душу его./ Рачение бо злобы помрачает добрая,/ и парение похоти пременяет ум незлобив./ Скончався в мале, исполни лета долга,/ угодна бо бе Господеву душа его,/ сего ради потщася от среды лукавствия./ Людие же, видевше и не разумеюще,/ ниже положше в помышлении таковое,/ яко благодать и милость в преподобных Его/ и посещение во избранных Его.

НА ЛИТИИ стихиры, глас 2.

Подобен: Доме Евфрафов:

Земле Полотская,/ красуйся и ликуй,/ возрадившая великую княжну,/ преподобную Евфросинию,/ во утверждение в Белой Руси Православия.

Преподобная мати Евфросиние,/ просветившая православием землю нашу,/ во Иерусалиме о Господе почившая,/ молися ко Господу/ за Отечество твое православное.

О всечестная мати наша,/ обители твоя похвало и утверждение,/ огради ю миром и благочестием,/ защити от новых разорений и осквернения,/ сохрани ю в Православии во веки.

Ины стихиры, глас 7:

Преподобная мати Евфросиние,/ житие твое на земли богоугодно совершила еси,/ праведна и во всех оправданиях Господних безпорочна./ Приидите убо, монашествующих собори,/ песнями и пении духовными/ светло ликовствуем днесь, сие зовуще:/ радуйся, апостольских и отеческих преданий ревнительнице;/ радуйся, Полотскаго града похвало;/ радуйся, Евфросиние всечестная,/ ты бо смирением и чистотою/ Царствие Небесное в чине ангельском наследовала еси. / И ныне Господу предстоя, моли Его даровати нам/ велию и богатую милость.

По долгу ублажаем тя,/ яко нашу похвалу и Ангела во плоти,/ житие бо твое, Евфросиние, честно/ и успение со святыми:/ просияла бо еси делы благими/ и

многих ко Христу привела еси;/ и Крест честней твоей обители завещала еси;/ по дару благодати Божия, обитавшая в тебе,/ пророчески провидящи по разрушении ея паки чрез Крест возобновление,/ еже ныне и совершися./ Темже мы, с радостию ублажающе тя, припадаем ти,/ со умилением молящися:/ молися за ны, мати преподобная, ко Господу,/ да подаст душам нашим велию и богатую милость.

Ины стихиры, глас 4.

Подобен: Яко добля:

Иже Еву прельстившаго змиевым образом,/ своим а ногама сего попрала еси;/ сласть бо преложиша женскую душею мужескою,/ совершенно мужества возраста исполнена Иисуса Христа,/ и, добле укрепльшися, Евфросиние,/ врага преобидела еси в женском телеси.

Дремания очима своим а, Евфросиние, не дала еси,/ ни паки убо покоя своим а бровям, приснохвальная,/ закону своего Зиждителя поучающися/ и псаломски подвижающися,/ духом восприемлющи сияние,/ неотступно Троическаго причастия зрящи/ и паче ума чистоты.

От пелен возжелевши прекраснаго удобрения/ и Жениха нетленна душевнаго – Иисуса,/ Сему уязвилася еси любовию/ и, радующися, притекла еси в сретение Его,/ возжигаючи душевный светильник девственнаго елея,/ и возшла еси с Ним в Чертог Небесный, преславная.

Слава, глас 7: Днесь светло красуется древний град Полотск/ Божественным сокровищем Креста Господня,/ егоже усердием твоим устроила еси,/ преподобная Евфросиние,/ и обитель твоя радуется о возвращении ей Честнаго и Животворящаго Креста,/ иже чрез многая лета сохранен бысть Промыслом Господним;/ емуже поклоняющеся с верою и любезно его лобызающе,/ исцеления душевная и телесная приемлем,/ Христа непрестанно величающе.

И ныне, Богородичен: Богородице Дево,/ упование христианом,/ покрый и соблюди ны/ Твоими к Сыну Твоему и Богу молитвами/ от всякия нужды и печали.

На стиховне стихиры, глас 8:

Преподобная мати Евфросиние,/ ты Христу Господу во смирении и кротости послужила еси,/ и многих ко спасению наставила еси,/ и сего ради от Господа воздаяние восприяла еси,/ Егоже моли спастися душам нашим.

Стих: Дивен Бог во святых Своих,/ Бог Израилев.

Преподобная мати Евфросиние,/ с любовию ублажаем тя,/ Евангелия истинную исповедницу,/ Православия ревнительницу,/ воздержания учительницу,/ Ангелом собеседницу,/ нищих и сирот питательницу,/ юже венча Христос венцем Небесным,/ Егоже моли спастися душам нашим.

Стих: Честна пред Господем/ смерть преподобных Его.

Преподобная мати Евфросиние,/ радостно совершающе память твою,/ прославляем подвиги твоя:/ во трудех бо от юности Христу послужила еси,/ ангельския чины удививши;/ на земли, яко безплотна,/ в постех и молитвах, и всеночных стояниях,/ и в Богомыслии пребывала еси./ Темже и Духа Святаго в душу твою прияла еси.

Слава, глас тойже: Светло украсивши светильник твой елеем чистоты и милости,/ в Небесный Чертог с мудрыми девами ко Христу возшла еси,/ к Жениху твоему Безсмертному./ Емуже прилежно молися/ о совершающих любовию память твою.

И ныне, Богородичен: Безвестная Дево,/ Яже Бога неизреченно зачещи плотию,/ Мати Бога Вышняго,/ Твоих рабов мольбы приими, Всенепорочная,/ всем подающи очищение прегрешений,/ ныне наша моления приемлющи,/ моли спастися всем нам.

По Ныне отпускаеши: тропарь, глас 4:

Подражаючи дванадесятолетна дванадесятолетну Христу,/ учившему во святилици Божію слову,/ последовала еси, Евфросиние./ Славу временную и земнаго обручника оставльши/ и вся мирская презревши,/ краснейшему паче всех Христу себе уневестила еси,/ крест взявши, путем ангельскаго житія шествующи/ и многія к Нему наставляющи,/ во благоухании мира в Небесный Чертог востекла еси,/ идеже моли, Егоже возлюбила еси,/ о чтущих благочестно память твою.

Ин тропарь, глас тойже:

Богатство свое нищим расточивши/ и славу княжескую ни во что же вменивши,/ обручника временнаго, красная дево, возгнушалася еси/ и, уневестившися Жениху Христу,/ Тому, якоже вено [\[1\]](#), чистоту душевную и телесную принесла еси, Евфросиние./ Емуже ныне в веселии предстоя,/ поминай нас, чтущих память твою.

НА УТРЕНИ

На Бог Господь: тропарь, дважды.

Слава, и ныне: Богородичен, глас 4: Еже от века утаенное и Ангелом несведомое таинство,/ Тобою, Богородице, сущим на земли явился Бог,/ в неслитном соединении воплощаемь/ и, Крест волею нас ради восприим,/ имже воскресив первозданного,/ спасе от смерти души наша.

По 1-м стихословии седален, глас 1:

Заповеди Господни возлюбивши,/ от юности твоя, преподобная мати, многим была еси наставница монашеского жития,/ многия ко Христу привела еси;/ темже днесь празднующе всечестную память твою,/ прославляем Бога, прославляющего святых Своя.

Слава: Внушивши Давида бряцающа, —/ приведутся Царевы девы по Тебе, —/ пречестная Евфросиния притече, яко добра и ближняя во след Тебе,/ возжегши девственную свещу.

И ныне, Богородичен: Устами и сердцем величаем Тя, Матерь Божию:/ Ты же, рождающая Бога, не отрини нас от Твоего заступления.

По 2-м стихословии седален, глас 1:

Девства чистотою украсивши твою душу,/ преподобная Евфросиние,/ со светильником горящим возшла еси во дворы Господа твоего,/ Егоже моли непрестанно, да и мы сподобимся причтени быти к лику избранных.

Слава: Поюще Давиду — забуди люди Твоя в дому Отца Твоего —/ приклонила еси ухо твое, яко дщи Царева в Дусе,/ возлюби бо Всекраснаго и Всемогущаго Царя, Христа Бога нашего.

И ныне, Богородичен: Скорая в бедах Заступнице,/ готовое обуреваемых пристанище,/ сохрани мя, Мати Божия, от потопления житейскаго/ и не даждь ми сокрушиться о камень пагубы душевныя.

По полиелеи седален, глас 8:

Просияла еси ангельским житием твоим,/ преподобная Евфросиние,/ украшаючися красотою нрава,/ воздержанием и милосердием,/ поучаючи духовныя сестры твоя/ словесы душеспасительными,/ и, примером слово утверждаючи,/ многих ко спасению привела еси;/ темже, приснопамятная Евфросиние, предстоящи Престолу Вседержителя,/ моли даровати грехов оставление/ чтущим любовию память твою.

Слава, и ныне, Богородичен: Пророцы Тя предвозвестиша, апостоли проповедаша,/ мученицы прославиша, святителие ублажиша,/ темже и мы с ними Богородицу Тя исповедующе, благочестно величаем.

Степенна, 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеву о всех, яже воздаде ми? Всякое дыхание: Евангелие от Матфея, зачало 104.

По 50-м псалме стихира, глас 7:

Благая и верная рабо Господня,/ иго Христово благое на себе восприемши,/ и бремя Его легкое на себе усердно понесши,/ и ныне в Небесном Царствии водворяющийся,/ о нас помолися, да сподобимся велия и богатыя милости.

Ина стихира, глас 6:

Приидите, любомудреннии,/ песньми богокрасными воспоим/
достохвальную и смиренную Евфросинию всечестную,/ и источники слез омоемся, рыдающе и плачуще:/ негли [\[2\]](#) Господь и Бог рыдание и плач восприимет,/ и аще тело и душу ея прия,/ понеже Его смирения сама изволила еси,/ нам может дати с духом ея совокупиться, притекающим,/ яко достохвальную и доброкрасную молитву ея восприимет,/ много бо может молитва праведнаго поспешествуема./ Молю же вы, братие,/ не лениви будем, в ночь и в день молящиеся к Небесному и земному Творцу,/ яко Дух Святой послет в стяжание,/ и молитвами блаженныя Евфросинии/ нас избавит от сети вражия/ и спасет души наша.

КАНОН, глас 6.

Песнь 1

Ирмос: *Яко по суху, пешешествовав Израиль/ по бездне стопами,/ гонителя фараона/ видя потопляема,/ Богу победную песнь поим, вопияше.*

Преподобная мати наша Евфросиние, моли Бога о нас.

От юности поучающийся священным заповедом Господним/ и желающи Ему Единому послужити,/ презрела еси славу и богатство мира сего.

Преподобная мати наша Евфросиние, моли Бога о нас.

Христа возлюбивши,/ родителей и сродников твоих и обручника земнаго оставила еси, преподобная,/ и монашеское житие восприяла еси.

Преподобная мати наша Евфросиние, моли Бога о нас.

Скорби исполнися сердце отца и матери твоя,/ егда во иночестем образе узреша тя, возлюбленную дочь свою,/ ты же словесы благими, вразумляюще тя Святому Духу, утешила еси их.

Преподобная мати наша Евфросиние, моли Бога о нас.

Яже в масле добродетелей свещу умасленну на сретение, мати, Жениха твоего возжже,/ просвети очи сердца моего,/ нощию житейскою омраченная,/ да достойно тя похваляю.

Слава: Ум старый в младе лет, мати, добывши,/ дерзаемо тело душе покорила еси, от юности впрягши под иго Христово/ и благодатное бремя легкое приемши.

И ныне, Богородичен: Скорбных наведения обуревают смиренную мою душу,/ и напастей облацы мое покрывают сердце, Богоневестная,/ но, Свет рождающая Божественный и Превечный,/ возсияй ми свет радостный.

Песнь 3

Ирмос: *Нестъ свят,/ якоже Ты, Господи Боже мой,/ вознесый рог верных Твоих, Блаже,/ и утвердивый нас на камени/ исповедания Твоего.*

В безмолвии со единым Господом молитвою желаящи соединиться,/ при святей церкви Святыя Софии в тесней келии водворилася еси, преподобная.

От труда рук твоих, преподобная, послужила еси Христу, Спасителю нашему,/ богоугодно упражняющийся в переписании книг святых,/ и ценою, вземлемою за них, утешала еси нищую братию Христову.

В кротости и смирении, в постех и молитвах,/ в трудах, и ночных бдениях, и молитвенных коленопреклонениях,/ усердно послужила еси Господу твоему, всечестная.

Сна не дала еси очима, ни веждома дремания, Евфросиние,/ дондеже обрела еси во твоём сердце место достойнаго обительства.

Слава: Пустынелюбица горлица бывши, Евфросиние,/ и уединяющаяся птица на здании,/ гнездо духовное птенцем твоим создала еси/ и пожила еси от юности житием ангельским, в телеси будучи.

И ныне, Богородичен: Удивила еси воистинну ныне на мне, Владычице,/ благодеяния Твоя, Богоотроковице, и милости Твоя,/ темже славлю Тя, и воспеваю,/ и почитаю многое и безмерное еже о нас смотрение Твое.

Ин кондак, глас 8:

Чистое свое девство и честное/ милостынею, яко светильник елеем, украсившую/ и с мудрыми девами в пресветлый чертог Христов вшедшую,/ Евфросинию славную ублажим/ и, припадше к честным ея мощем, насладимся ея благоухания/ и умильне к ней возопием:/ яко имея

дерзновение ко Христу Богу,/ моли избавитися зловония страстей и спастися душам нашим.

Ин кондак, глас 4.

Подобен: Вознесыйся:

Превитавши от земли Полотския,/ отечество свое, яко Авраам, наследовавши, Евфросиние,/ землю высоко сообразну – Горний Сион,/ темже тело твое душевным благомужеством,/ страданием постным, яко жертву, приносила еси/ милосердием Своим, Давшему Себе/ за человеки Жертву благоприятну.

Ин икос:

Премудрость Соломон приим от Бога,/ хвалит бо в притчах мужелюбиву жену,/ яко своему мужеву двое ризы сотворяющую,/ аз же ныне в песнех хвалю боголюбиву Евфросинию,/ в ночь и в день подымающую преподобнии длани к Богу,/ да огня избавит негасимаго, зубнаго же скрежета и вся муки/ нас ради, верующих, Давшему Себе Жертву Отцу благоприятну.

Седален, глас 4:

Ангельскаго видения сподобилася еси, преподобная мати Евфросиние,/ трикратно бо посети тя Ангел, возвещающая ти волю Господню,/ да идеши на место, нарицаемое Сельце,/ и устроиши тамо обитель дев, Богу освященных.

Слава, и ныне, Богородичен: Едина истинная христиан Покровительнице,/ всяких лютых обстояний, бед и скорбей нас избави/ и молитвами Твоими спаси души наша.

Песнь 4

Ирмос: *Христос моя сила,/ Бог и Господь,/ честная Церковь/ боголепно поет, взывающе,/ от смысла чиста о Господе празднующи.*

Ангел возвести бывшему во дни твоя святителю Илии о тебе, преподобная,/ дати место, во еже обитель устроить.

Якоже возлежит на главе царстей венец,/ тако почивает Дух Святый на тебе, преподобная, –/ сице возвести Ангел святителю.

И яко миро восходит к Богу, тако восходит молитва преподобная,/ и яко солнце сияет на тверди небесней, тако просия житие Евфросинии пред Ангелы Божиими, –/ глагола Ангел в видении святителю.

Одежда нагим и богатство нищим,/ кормительница алчущим была еси и
сырым мати,/ лютых избавляющи к тебе прибегающих,/ темже твоя во веки
память пребывает,/ Евфросиние, Полотскому граду похвало.

Слава: Невеста Христова, мати, явися,/ масло многоблагоуханно
совокупивши в девстве/ и обоюду возвеличивши его./ И ныне радуешься
вечно, в обитель Небесную водворяющися/ и Божественную светлость
приимающи.

И ныне, Богородичен: И где прочее иное обрящу заступление?/ Камо
прибегну? Где же и спасуся?/ Кую теплую возним Помощницу,/ скорбми
житейскими и бурями, увы мне, колеблему?/ На Тя Едину уповаю, и дерзаю,
и хваляся,/ и притекаю к покрову Твоему: спаси мя.

Песнь 5

Ирмос: *Божим светом Твоим, Блаже,/ утренующих Ти души любовию
озари, молюся,/ Тя ведети, Слове Божий,/ истиннаго Бога,/ от мрака
греховнаго зывающа.*

Радости и удивления о видении ангельском исполнися архиерей Господень/ и
призваша тя, преподобная, возвестити ти чудное явление.

Волю Господа твоего со усердием исполнила еси, преподобная,/ и пришла
еси на место, показанное ти Ангелом,/ и тамо водворилася еси.

На единого Господа возложивши твердое упование,/ ничтоже стяжала еси от
имений,/ но в нищете евангельстей пребывала еси.

На разумнем камени храмину неподвижиму создала еси, славная,/ и
треволнения страстей отбегла еси,/ благоутешным Духом Параклитовым
подъемлема в Вышнюю и Божественную обитель.

Слава: Небрегши отчия славы и гордения,/ но одинокое житие и неимение,
Евфросиние, возлюбила еси/ и, крест Христов на рамо взявши, последовала
еси Ему, зовущему тя.

И ныне, Богородичен: Кий Тебе дар принесу благодарения/ за, ихже
насладихся, Твоих дарований и Твоя безмерная благодать?/ Темже
славлю, песнословлю и величаю Твою неизреченную ко мне милость.

Песнь 6

Ирмос: *Житейское море,/ воздвигаемое зря напастей бурей,/ к тихому
пристанищу Твоему притек, вопию Ти:/ возведи от тли живот мой,
Многомилостиве.*

Видевше ангелоподобное твое житие,/ многия девы восхотеша обручиться Христу/ и в чистом девстве Ему Единому послужити.

Сестра твоя, княжна Звенислава, подражаючи тебе,/ отвержеша славы и наслаждений мира сего/ и к тебе притече, иго Христово благое на себе восприяти.

Видя умножающиеся сестры твоя духовная, Евфросиние всечестная,/ возжелала еси соорудити храм Господу Вседержителю,/ честного и славного Его Преображения.

В чаши своей вино всею душою черпавши/ и столп доволен поставивши, воспела еси:/ хлеб мой яждьте и вино вси пейте, жаждующии.

Слава: Утреневавши к Богу, голубице,/ была еси посребрена светло крилома, славная,/ златом же блестящи междурамия различным деянием.

И ныне, Богородичен: Утешение в скорбех вем, и недугов исцеление Тя знаю, Богомати,/ и всесовершенное сокрушение смерти,/ и реку живота неисчерпаемую,/ и всех, сущих в напастех, скорое и быстрое заступление.

Кондак, глас 8:

Избранней Богом от самого рождения и призванной на служение Ему,/ в чине ангельством Господеви послужившей свято, и преподобно пожившей,/ и ныне с Небесными силами Господа восхваляющей,/ о нас же, грешных, пред Господом ходатайствующей,/ с радостию и любовью воззовем:/ радуйся, Евфросиние, невесто Христова всечестная.

Икос:

Ангельски на земли житие совершила еси,/ чистотою и смирением, кротостию и терпением,/ милосердием и воздержанием Господеви угодила еси,/ и ныне во светлостех святых почиваючи последи трудов своих,/ прими от нас пение сие:/ радуйся, девственнице душою и телом;/ радуйся, наставнице предивная инокинем;/ радуйся, еще на земли сподобльшаяся ангельского видения;/ радуйся, от Господа чрез Ангела устроить обитель повеление приемшая;/ радуйся, со усердием волю Господню исполняя;/ радуйся, вся земная наслаждения мира сего Христа ради отвергшая;/ радуйся, Небесному Жениху, Иисусу Сладчайшему, себе обручившая;/ радуйся, в чистоте, постех и молитвах Тому послужившая;/ радуйся, безценное сокровище – пречестный Крест обители своей во освящение и утверждение стяжавшая;/ радуйся, в трудах дневных и ночных житие свое совершившая;/ радуйся, в невечернем дни Царствия Божия ныне пребывающая;/ радуйся, Евфросиние, невесто Христова всечестная.

Песнь 7

Ирмос: *Росодательну убо пещь/ содела Ангел/ преподобным отроком,/ халдеи же опаляющее/ веление Божие мучителя увеща вопити:/ благословен еси, Боже отец наших.*

Не о своем точию спасении прилежаше ти попечение, преподобная мати,/ но о всех, ихже ти вверил есть Господь,/ ихже поучала еси в законе Господни, творити волю Его.

Образ была еси словесному твоему стаду, всечестная Евфросиние,/ дела благими, смирением возвышаяся, и кротостию привлекая,/ и терпением утверждая пребывати непреклонными в любви ко Господу.

Егда совершашеся созидание храма Господня,/ Ангел возбуждаше строителя, глаголя:/ Иоанне, иди на строение храма Вседержителява.

Яко права ученица смиренного и мирного Христа,/ князем сродником, друг на други дерзающим подъяти меч, возбранила еси,/ яко оружием обоюдоострым, пресекающим, словом Божиим устрашающим.

Слава: Издалеча собираючи Божественное богатство,/ яко далече ходяй корабль,/ борзописчими персты добре писала еси, Богодухновенная,/ поемлющи отай и даючи нищим.

И ныне, Богородичен: Всею душею, и мыслию, и сердцем, и устнами Тя славлю,/ насладився Твоих великих дарований, и Твояя благодости,/ и безмерных Твоих чудес.

Песнь 8

Ирмос: *Из пламене преподобным росу источил еси/ и праведнаго жертву водою попалил еси:/ вся бо творииши, Христе, токмо еже хотети,/ Тя превозносим во вся веки.*

С верою и твердым упованием помолилася еси, преподобная, ко Господу,/ и услыша Господь моление верная рабы Своея,/ и чудне совершися создание храма Его.

Радости и веселия исполнилася еси, преподобная Евфросиние,/ егда совершися освящение храма,/ в немже, о еже прошением нашим услышанным быти от Господа/ со слезами молилася еси.

Мощна бе пред Господом молитва твоя,/ зане храм, воздвигнутый тобою, чрез многая лета цел и невредим сохранися.

Избавление обретши, Господи, горькаго осуждения,/ еже вкушения ради древа разумнаго Твоим распятием,/ Евфросиния постящися бысть во вся среды и пятки,/ тело умерщвляючи, а душу оживляючи/ потщанием, божествуящим в безвещественном теле.

Слава: Плодолетными вербами телесное деяние, яко на Вавилонстей реце повесивши,/ в бури житейстей возопила еси:/ аще забуду тя, Иерусалиме, не предложивши в начале веселия,/ забвена буди десница моя/ и язык мой прильпни гортани моему по правде.

И ныне, Богородичен: Обстояния, и скорби, и нужды обретоша мя, Чистая,/ и напасти житейския, и искушения отвсяду мя обыдоша,/ но предстани ми и покрый мя святым Твоим покровом.

Песнь 9

Ирмос: *Бога/ человеком невозможно видети,/ на Негоже не смеют чини Ангельстии взирати;/ Тобою бо, Всечистая, явися человеком/ Слово воплощенно,/ Егоже величающе,/ с Небесными вои Тя ублажаем.*

Возжелала еси имети во обители твоей икону Пречистыя Богоматере,/ юже и получила еси,/ и, радостно тую приемши,/ многая благодарения Господу и Пречистей Матери Его воздала еси.

Крест честный устроила еси усердием твоим, преподобная,/ и каплю Божественныя Крове Христа Спасителя,/ и часть Животворящаго Древа в нем положила еси/ на освящение и спасение всем, поклоняющимся ему/ и целующим его с любовью и страхом.

Многая лета в тесной келии, при храме Господнем,/ в молитвах и коленопреклонениях препроводила еси, преподобная Евфросиние,/ яко безплотна, на земли пребываючи.

Текла еси, якоже царица не Южская,/ но с трепетом видевши рукотворную церковь и гроб,/ в нейже тридневный Всетворец, Божия Мудрость, вселися,/ и тамо благослови Бог прияти тя, добрая дево.

Слава: Ливан, и смирну, и злато волсви Творцу Тебе принесоша,/ Евфросиния же – душу, и тело, и житие непорочно,/ сраспеншися Тебе, Христе, и совоскресши Тебе и в безконечном Царствии с Тобою царствующи.

И ныне, Богородичен: Радость от Ангела приемшей и мы, по проречению Твоему, Пресвятая Дево,/ ублажающе Тя со всеми роды, евангельски вопием:/ радуйся, Благодатная, Господь с Тобою.

Светилен, глас 8:

Преподобная Евфросиние, славна память твоя,/ воистинну бо на тебе исполнися слово Духа Святаго:/ в память вечную будет праведник./ Темже и нас, совершающих память твою с любовью,/ спасай от всякия беды и напасти.

Слава: Иже древле проповедаша, радуется вечно Евфросиния о Господе,/ узы плотския отрешивши, и Тебе, Зиждителя, лицом к лицу видящи, видима Тобою,/ и молящи избавитися от всякия лютости в песнях присно ю похваляющим.

И ныне, Богородичен: Радуйся, престоле огнезrachный Господень;/ радуйся, Божественная и манноприемная ручко;/ радуйся, златый светильниче;/ радуйся, свеще неугасимая;/ радуйся, девам славо и матерем украшение и похвало, Богородительнице.

На хвалитех стихиры, глас 8:

Земныя пиши наслаждение,/ богатство и славу мира сего презревши,/ Небеснаго Жениха возлюбила еси,/ Евфросиние всечестная;/ добре подвиг твой на земли во иночестем чине совершила еси,/ с мудрыми девами возшла еси к Жениху Христу,/ Емуже в радости ныне предстоя,/ непрестанно молися о душах наших.

Христу, от Чистыя Девы воплощемуся,/ последовала еси, Евфросиние,/ в девстве Тому от юности твоя послужила еси/ и многим ко спасению путь показала еси./ Сестры моя возлюбленные, – глаголала еси,/ – тесен и прискорбен путь, вводяй в живот,/ но вечно воздаяние;/ темже подвизайтесь неленостно,/ имате бо помогающаго, Самаго Подвигоположника Христа,/ подающаго живот нетленный.

Богом избранная, Евфросиние,/ яко звезда пресветлая,/ от рода своего возсиявшая,/ страну сию просвещающая,/ о всех, к тебе усердно притекающих,/ и молитв твоих ко Господу просящих,/ и любовь целующих честный твой образ,/ буди молитвенница и избави нас от всякия скорби,/ от всякия болезни, душевныя же и телесныя,/ верою и любовью совершающих/ память честнаго преставления твоего.

Торжество днесь преподобныя Евфросинии празднующе,/ приидите, вернии, воспоем подвиги и труды ея,/ восхвалим серафимскою любовью Иисуса Сладчайшаго возлюбившую/ и Ему усердно послужившую,/ и с верою и любовью воззовем к ней:/ радуйся, Евфросиние всечестная,/ красото и похваление монашескаго чина,/ невесто Христова избранная,/ со Ангелы и всеми святыми/ в невечернем дни Царствия Божия водворившаяся;/ молися же спастися граду твоему,/ земли нашей и всем православным людям.

Слава, глас тойже: Во святыи град Иерусалим поклонитися Гробу Господню возжелавши/ и достигши земнаго Иерусалима,/ в радости святым местом Гробу благоговейное поклонение воздала еси, Евфросиние,/ прося у Господа благодати,/ да примет дух твой на месте святем;/ и услыша Господь молитву твою,/ и посла Ангела,/ иже возвести ти о прешествии твоём/ от земнаго Иерусалима в Горний Иерусалим Небесный,/ идеже радостно ликующи со девственными ликами,/ поминай нас, с любовию празднующих святую память твою.

И ныне, Богородичен: Владычице, приими молитвы раб Твоих/ и избави нас/ от всякия нужды и печали.

Славословие великое и отпуст.

На Литургии служба вся преподобней жене.

*Служба на преставление преподобныя матери нашей Евфросинии
печатается по Минеи 2002 г. – М.: Издательский Совет Русской
Православной Церкви, 2002*

[\[1\]](#) Вено – брачный выкуп.

[\[2\]](#) Негли – может быть.